

Angelica Hale

Aganchengani:

Angelica Hale saksa bi·sa namen gisik matsrambegipa aro mongsongbate namen git ring·na changbegipa ong·a. Ua kidney saako man·e namen neng·nikaniko man·ahaoba Isolni ka·sabeanichi aro uni ma·gipani namen an·tangko on·kangpile ka·saanichi ua janggi tangkuna man·aha. Uni golpoko poraie uni ma·gipa pagipa baditan neng·nikbegipa obostako cha·gronge pilakon chena jikse ku·cholsan ong·e deme·chikko dakchakaha aro da·alona kingkingba janggi tange America a·songo namen darangni ma·sigipa bi·saonin aski rong·sa ong·paaha.

Angelica Haleni Ma·gipa Pagipa:

Angelica Hale July 31, 2007 bilsio Atlantani Georgia-o atchiaha. Uni pagipa James Hale aro ma·gipa Eva Bolando ong·achim. Angelicani pagipa James-ara Filipino aro Caucasian¹ ong·a, ma·gipa Eva Iligan songjinma Phillipines-oni ong·achim. Angelica Hale saksa dingtang manchagipa (special) bi·sa ong·achim, ua saksa namen git ring·na changbegipa aro gisik seng·begipa ong·a, indakgipa deme·chik·ko man·na James aro Eva namen rasong gnangbegipa ma·gipa pagipa ong·a. Ua “America Got Talent” chang-12 gipa 2017 bilsio namen mingsingbegipa ong·aha aro ua Final-o gnigipasan ong·genchimoba uan uni ring·na changani giminde ong·ja, indiba vote on·susaaniosan ua gnigipa ong·na nangaiachim.

Angelica Hale Magipa Pagipana Nokdango Kusini Pangchakani:

James aro Eva an·tangtangni nokdango nambegipa deme·chikko man·pae namen kusi ong·beaha, aro uamang nokdango kusi ong·e sal somoirangko re·atpaengachim. Deme·chikni dalrorobaengon uamang jikse an·tangtangni ka·sanio namen ning·tubatrikrikaha, basakoba deme·chikko detome jikse nitatgrike kusi ong·beengachim. Angelica ku·sik agan·mijekbahaon uni gisik senga aro dingtangmanchagipa bi·sa ong·aniko magipa pagipa u·ina man·aha. Mongsongde uni bilsigni mang ong·engpition uni git ring·na changaniko pagipa magipa u·ina man·e namen uamang kusi ong·bataha.

Nokdangna Rang·gitikgipa Dukni A·bachengani:

Angelica bilsibri gapahaon ku·sik agana aro re·na dona aro chanchina changahani gimin uamang nokdango ka·srokanian gapengachim. Mandeni janggi tanganio knal mai ong·nasienga darangba agansonade man·ja. Salsao Angelica uni kusi ong·rong bewal gitade kusi ong·jaengachim, skangde ua pangnan ma·gipani gitrangko Home Theater-o gamatahaon ua kusi ong·bee rakbegipa sulrangkoba high pitch-o mangba chue salemingba git ringna changbegipa ong·baengachim. Uni uko cha·genma inoba cha·na sikja, uko ringgenma inoba ringna sikja dakani gimin ma·gipa aro pagipa jajrengna a·bachengengaha. Attamasao ua fever bilongbate saani a·bachengaha. Deme·chik saahaon uamang jajrengna a·bachengaha, aro uamang sepangbatgipa Hospitalona deme·chikko rimange uko Doctor-na mesokeaha. Doctor uko name am·sandie sana bananiko mingsani jamano mingsa dake sana a·bachengaha. Uan 2013 bilsio uni bilsio 4 ong·mittingo ong·enggachim. Doctor jegita uko sana bananiko dakgenchimoba uni saani bilongbatroroaiaha. Bon·kame uo Pneumonia saniko man·aha ine u·iaha aro ua bang·bea be·en bakrang kam ka·jaha, mongsongbate kidney kam ka·jaha. Uko sal 80-na kingking Children’s Health Care-o dong·e sana bananiko dakaha.

James aro Eva jiksese uamangni nitobegipa aro gisik matsrambegipa bilsio 4 mamang ong·enggipa deme·chikna indakgipa obostao namen jadipchangpilgipa kenatani ong·aha. Batchiniba chatbegipa aram niksrappigiao balwa balpakbae uamangni kosako simdape ka·sinjrimjrim kanamgijagipa ka·giting kimprete to·tro ong·ata gita ong·pilengachim. Bano ua kanamgijagipa mikka wajakrana nape chakgenok ingipa gita uamangni nokdangna ong·engachim. Uamangni deme·chikni kidney samgnian nosto ong·aha ingipa reportko Doctor uamangna aganon uamangni gisik ka·tongo namen andalpile nikaiahachim. Darangni janggi tanganioba sawa uandakgipa duk aro ka·beaniko chanchie bik dake namataina man·gipa ong·jawachim. Uamang cha·napjaha, ringnapjaha, tu·napjaha, wal tongsaoba jikse tuaoni chakate basakoba jikse nitatgrike gipakgrike mikchirangsa gra gra ting·totbaiaha. Basakoba Angelicani ma·gipa deme·chikni kalgipa sofani mapil (Teddy bear)-ko gipake aiao ama, aiao ama chinga nang·ko maidake namatna man·genok ine grape grape dong·aiaha, chanchie chanchie uamang mamingkoba dakna chanchisokpiljaengachim.

¹ https://en.wikipedia.org/wiki/Angelica_Hale accessed on 12/10/18 at 8:46 Am.

Nokdangna Adita Ka-dongatani:

Pringsao uamang Doctor-ko grongna re·angaha, unon maiko dake deme·chiko an·sengatpilna man·genchim agangrikenggon Angelicani ning·o be·enni bakrangoni kidney nosto ong·gipa mamingdakeba nampiltaina chol dong·chongmotjaha inesa aganaiaha. Ma·gipa Eva segipani jakko rim·skape grapaha, unon doctor uamangko ka·dimeatna jotton ka·engachim, aro uamangna mingsa cholko janapaha. Ua cholko jensomoio doctor uamangna agana a·bachengon Eva mikchi itpake nachil songe knatimna a·bachengaha. Uamangna agangipa cholde saoba Angelica-na kidney rongsako on·genchimode ua janggi tange dong·kuna man·kugenchim ine aganaha. Aro kidneyko man·gnini giminba cholrangko uamang baksa golpo ka·grikjolaha. James aro Eva maikai kidneyko man·gen uamang doctor baksa ning·tuen agangrikaha, uamang kidney-ko donation on·giparang dong·genma cholrangkoba agangrikjololengachim. Uamangna namen andalgipa somoio chelbeao chingchetchet teng·subaenggipa chon·begipa seng·watni ching·ani uamangna teng·suata andal mitmat mitmat dakgipa ramako re·angenggipana ka·donganiko aro kadimeaniko on·ani gita uamangna ong·aha. Uamang jiksese doctor-ni roomoni rang·spie ong·katbaaha, aro uamang madrang baksa aro ripengrang baksa iachi uachi mail ka·grikaha, phon ka·grikate bano maikai kidney rongsako man·e deme·chikni janggiko rakina man·genchim sandiroroaha. Uamang attampilahaoba darangonikoba maming namgipa aganchakaniko man·jahaon uamangni pringo adita ka·dimeanide apan duk mikchi aro ka·dongani gri ong·anian attam salniangahaon ong·bataiaha.

Attam walahaon jikse aue-miksue cha·na asongon uamangni oko mamingba chi aro juice-rangko ringgipana agre mamingan oko dong·jagenchimoba ku·siko cha·aniko sikatna mikchirangsa skangbaiaha. Jiksean mikkangtangtango cha·aniko done asongon okkachangaiaha. Eva segipachiko nie “Honey ka·sapae na·a cha·aniko cha·pabo na·ade bilgrigen” ine aganpabeaha, James maming kattako aganna man·pilgija mikchisa grao grao dakbataiaha. Jikse cha·chakanio an·tangtangni chamosrangko don·gale apple aro drak biteko rongsang ronggni kolame uko cha·ate tableoni cha·katpiltokaiaha.

Angelica Ma·gipa Eva An·tangkon Deme·chikgipana On·kangani:

Uamang asongchakramo asongtaiaha, aro mail check ka·taitaiaha, aro Eva phone iachi uachi sekdepdepe kobor ra·kuengachim, indiba darang madrangonikoba aro ripengrangonikoba namgipa koborrangko man·sojaha. Unon Eva segipachiko niate, ‘Honey mingsako nang·o sing·na’, unon James jikgipachiko niate ‘maia honey de singbo’ ine aganchakataha. Segipani permissionko man·e Eva an·tangko ka·dongate aganaha, ‘honey anga angni kidney rong·sako nono-na on·genchimoba anga aro nono janggi tangpakuna man·genbamo?’ Jikgipani kattako knachengo, James ‘no, no, no’ na·a indake dakna man·jawa ine aganchengaiaha. James jikgipako gipake, ‘honey maiba ong·na nangode anga nono-ko aro honey nang·ko anga gimaatna sikjawa’, aro James jikgipako gipake ka·siksike graptaitaiaha. Unon jikgipa doctor aganenga mande kidney rongsachiba janggi tangna man·aia ineming, unigimin anga aro nono sakgnian tangna man·pagen ine agane segipao molmoltaitaiaha. Jamanode jikgipani kattakon maniaha, aro uamang sakgnian namnike uko daknan tik ka·aiaha.

Pringo uamang somoi gita sikmanchi (Hopital) re·angtaie doctor-ko grongtaiaha, aro uamangni chanchianiko parakaha. Doctor unon uamangna pilakon talate on·ahaora, jiksena adita ka·dongataniko aro ka·dimeataniko man·paaha. Unsalon doctor Eva-ko check ka·na pilak dake nina nanganirangko dakna tik ka·aha. Unon segipa, doctorni kuturioni ong·katbaahaon, jikgipa gipake “*I Love You so Much Honey*” ineming jikgipako mikchi baksa aro pilsara kusi baksa jikgipako test ka·na Laboratoryni kuturichi re·angdilaha. James jikgipako Laboratory ningchi don·bae deme·chikgipako niuate gisiko Pagipa an·jrim an·jrim dakpilaha, maina maiba ong·na nangode jikgipako aro deme·chikoba gimaatahaode ineba ua gisiktango chanchie namen kenanirangde dong·aiaha.

Adita somoirangna James asongchakramo asonge jikgipani Laboratorychi test ka·na re·anganiko sengsoengachim, jikgipa test ka·na pilakon dakmanahani jamano Laboratoryoni ong·katbaaha aro James jikgipako nisoe “are you ok” ine singsoengachim. Unon Eva “Yes honey I am very much ok” ine ka·dingsmite ong·katbaaha. Segipa deme·chikna ka·saoba jikgipanaba namen ka·sabeani gimin uni gisiko jikgipanaba namen jajrenganide dong·aiachim. Uamang canteenchi re·angaha aro adita juicerangko ring·aha, aro Evani kidney aro an·chi test reportko indaken seng·kuaha, aro pilsara ka·donga basakoba ka·dongijanirangba sokbae uamangko rang·spiatengachim.

Uamangni sengkemittingo Eva Bolando Hale ine bimingko okamataha unon uamang jikse reportko ra-na chakataha, aro uamangna reportko on-gipa doctor na-simangko taraken uni kuturiona grongna okamatenga ine aganaha. Unon uamang doctorni kuturiona tarake reportko badaljoljole re-angaha, aro doctor ontisa ka-dongani mikkango ontisa ka-dingsmite helo asongbo inaha. Uamang sakgnian apsan a-songahaon, doctor uamangna namgipa kobor ine aganchengaha. Doctor aganaha, da-o Angelicana ka-dongani ma-gipani an-chi aro kidney pilak match ong-aiaha ine aganaha. Eva segipani jakko rim-skape ‘yes, yes, yes’ ine kusi ong-aha. Doctor pilakon name talate maiko dakna nanga aro maidake dakgenchim talate on-tokaha aro basako dakgenchim ukosan uamang baksa agangrikon uamangba namnikpaiaha.

Angelica Magipa Deme-chikna Kidney Transplant Ka-ani:

Pringsao uamang doctorni aganatgimin somoi gita uamang sikmanchi (hospital) re-na tariaha. Jamesni gisiko pilsa kusini aro pilsa kenanirang sokbaengachim, maina jikgipana maiba ong-na nangode ine ua ken-chaksoanirangde nabaengachim. Ua deme-chikgipana mingsa ka-dongani baksa kusi ong-soanirangba uona sokbaskaengachim. Pilakkon noko tarina nangarango tarimano nokoni rang-spie re-ongkatange sikmanona sokange joljol deme-chikgipako don-gipa kuturiona re-ange Angelikako grongchengaha. Deme-chiko gronge ai nangna nangni Ai rongsa kidneyko on-engaha aro na-a nampilgenok ine aganaha. Angelica Ai mitela, Ai mitela ine ma-gipako gipakaha, aro Angelica una aganaha, “You are my best ever mom” ine gipakrote ku-dimbeaha. Pagipa Jamesba uno gipake maningsakon doktopbee sakgnikon ku-dimaha. Indake uamang ua kuturioni ong-katbaaha aro ma-ningsakon Operation Theatre-ona rim-napangaha. James jikgipa aro deme-chikko jako rim-skape, “honey you will be alright” ine aganengon ka-tong ningode namen kenbeanirang baksasa ong-kuengachim. Nurserang uamangko operation kuturiona rimnapangaha.

James apalo saksan chadengrikengon gisiko namen an-jrim an-jrim dake kenanirang baksa namen ka-tong mobaengachim. Uan una namen rakbegipa somoi ong-engachim, maina jikgipani kidney ronggnioniko rongsako deme-chikna transplant ka-anio uni jikgipana aro deme-chikna mai ong-gen jajrengbeani ong-aha. Ua uamangni namitting salrango jikse kusi ong-aniko aro deme-chikgipako demikkangani jamano maidake nokdango sal somoirangko re-atahachim uarangkoba mingsani jaman mingsa gisik ra-atbeeangachim. Uni gari sale nokdango songremittingo deme-chikni gario gitrangko gamaton git ga-subee ring-anirangko aro ua changsaode baba anga supper star ong-genmo ine deme-chikni nikjumanganirangko gisik ra-atengachim. Jensomoio baba anga supper star ong-gen, anga babana gari ga-suako ra-gen aro Ai-naba nok ga-sue rikgen ine deme-chikni bi-sani nikjumange belbelanirangko gisik ra-atengachim uni mikrononi mikchirangsa grao grao ga-akbaiaha. Unon uni madrangrangba uko jangilo doktope, mamingba ong-jawa kenabe aro jajrengnabe ine uko ka-dimeatna agantokaha.

Ua jigipani ka-saaniko da-osa ning-tubate nikate una ka-sae dakanirangko gisik ra-ate ka-tongo dong-tobajaengachim. Uamangba bangbea jumangrang jikseni gisepo dong-paen apsan kusi ong-mitting somoio basakoba on-timinti gisik sa-dikgrikanirangkoba ua da-osa gisik ra-ate suk ong-jaha. Badiaba somoio an-tangan jikgipana gisiko saknaatanirangkoba dakmanahani gimin uarangko gisik ra-atpilengon una namen gisiko dong-siksakanirang ong-baskaaha. Uaranga ua ku-misichi “honey I am so sorry” ine gisiko aganmitupilengon manderang uni indake dakako ku-chil moanirangkosan nike maikon aganengachim darangba uni gisik ning-o jajrengani aro kenanirangko nikoba u-ipajaha. Indaken uamang adita kontarangkode re-ataha. Children’s Miracle Network Hospital, Atlanta-ni Nurserang aro dakchakgipa support staffrangba uan dakronggipa transplant ka-ani ong-jaani gimin maian ong-gen gisiko namen so-sojengjeng ong-tokengachim.

Adita somoirangni jamano Nurse saksa ong-katbaaha aro Jamesko okamaha unon pilakan chakatokaha aro singaha maiba ong-ama ineming. Indiba ua Nurse Jameskosan okamaiaha, unon ua Nurse bangija agangolpogrika matchote Operation Theatrechi napangtaiaha. Unon jinma madrangrang maiba ong-ama, maiba ong-ama ine jinma grao grao Jameso sing-tokengachim. James jinmachiko nie aganaha mamingba ong-jana indiba Angelica aro ma-gipako apsan kuturio donaigenma ba gipinko arrange ka-genma inesa agangrikanisan ong-aiaha ine aganchakaha. Ianora dalgiminrangna simsakani Sikman ong-jaesa ontisa man-dikade man-diknaba dong-a unigimin badiaba gipin Sikmanchi rim-angnakode da-on tik ka-soaiboha inesa aganengachim ine James jinma maharirangna aganaha. Unosa gimikan oh, oh intoke ontisa jajrenggipa mikkangrangba rang-spitokaha.

Angelica Hale-na Ka·dongani:

Unikoa Jamesni maharioni mitamrang Sikmanni mongsonggipa chalaigipaona re·ange agangriktokaha aro unon uamang Eva-na dingtangmancha simsakna (special care) uamangan jako raatana ku·rachakaiaha. Dikdiksani jamano piltai Nurse saksa ong·katbaaha aro Transplant chu·sokaha ine aganeaha. James aro uni madrangrang kusi ong·toke Jamesko gipaktoke katcharimtokaha. Unon Jamesni mikrononi kusini mikchirang ting·totbaengachim. Unikoa Nurserang Operation Theatre-ni dogako oate Angelica aro ma·gipako ra·ongkatbae gipin kuturiona rimangaha. Uanona James jikgipa aro deme·chik baksa re·angpaaha, indiba uamang maningsade mamingkoba u·ikujaengachim maina uamangna Anastasia on·esa Transplant ka·ahani gimin uamang ua somoiode be·en bimang gimikan an·ma goka ong·kuengachim. Uamangko je kuturiona rimangaha unona sokangahaode darangba uchi staffrangna agrede napangpana man·jani gimin Jamesba do·gacholo chadengrikna nangaiaha. Ua kuturio glassrara ong·ani gimin nikatnade man·aiachim. Madrang gimikan glass gita niatoke mitamrangde noktangtangchi re·angpiltokaiaha.

James uno adita kontarangna asongenggon jikgipani siksakako nikataha aro Nurserang re·ange bara pingate uamang nirokon unon James jajrengna a·bachengtaiaha. Ua nurserangoni aditani jamano ong·katbaaha aro bara pinggipako oprakatahaon Eva mikron mikaoe segipako niataha unon James ka·suang suang dake jikgipako niatahaon jikgipa ka·dingsmite jaksi bima (Thump finger)-ko de·doe anga namenga ine mesokataha. Uni dikdiksani jamano da·obatai Deme·chikgipa Angelica mikrakbaaha aro aditan deme·chikgipakode bilgribeesa nikatengachim indiba uaba Pagipana ka·dingsmitataha.

James deme·chikgipa aro jikgipani ka·dingsmitatako nikate namen kusi ong·beaha aro Isolko mitela ine salgi nigitoe aganaha, “Thank You Lord”. Unon James mikkang dingtangna a·bachengaha aro uni janggi tanganio mikkangchina ka·dongani uni ka·tongona sokbaaha. Ua ku·misichi Isolko mitelbeaha unon ua chu·ongnikaijaha batesa neng·takram kuturichi napange Isolko ja·sku dipena mitelaha. Aro ua gisiko namen be·eni aro gisikni gita nenggokbee da·osa be·en gisik ritchengkalaha aro uni sko namen bal bojako rakie don·gipako maiba bilchi salope galataha gita ong·aha. Ua da·o gisiko ka·dimean baksa neng·takon basakon jrip dake tujripangaha u·irikjaha ua adita somoina tom·tom mamingkoba u·igija sarigija tusingaha.

JAMES-NI JUMANG:

James namen tusipekangahaon jumangchi deme·chikgipako nikaha. Ua biap damsachi jikgipa baksa uni deme·chik Angelica Hale-ko rim·bite re·angaha ua biap namen bangbanggipa bakra dakgipao ong·engachim. Ua biap namen a·bri apatal dakao ong·a. Uamang adita somoirangna neng·boke dong·engani gimin ua salo gisik be·en neng·takna somoi ra·ani sal ong·achim. Ua a·bri apatalo namen kamachi burung simdim simdim chiringrangko ganggopa aro uarango do·drangni dingtang dingtang sulrango mikoe uamangni ka·tongko katchaatengachim dingtangmancha uarang Jamesni gisiko balwa baljipjange ku·misichi ‘James nang nokdangna gital ka·dongani aro rasong nichaksoenga’ ine jinma jinma aganenga gita uni gisiko kusi ong·atengachim. Attam salniango salni aramrangko nitoe gitchakmrang dake a·patalo dong·gipa samsirang aro chonchonggipa boldimrangko rimit rimit rongrang dakatokaha. A·pataloni jokonnanggipa chiringrang ro·ongrango nangchake knatoe gamatan baksa chirang kusi ong·e an·senge ka·dinge kalgrikroroe uamang ro·ongo nangtinge chadobagipa guurirangni ka·sinjrimjrim balakasin uamangko baldapengachim. Unon Eva uni jakko rim·e honey nangko mitelbea nangni daalo nokdangna somoiko on·e ia biapona dilbaahanina ine segipa gipake peo ku·dimataha.

Angelica namen gisiko bi·sani an·sengani gita a·bokataha unon uni gitni ku·rang rong·kuchako nangchake uni chrikatani sulrang nangchake chotchanggija dake gamchakroraangaha (echoing). Angelica indake gamchakgipa ku·rangko an·tangan knapile namen suk ong·bataha ua ku·sik oe gambate gitrangni sulrangko chu·begipa sulchi (High pitch) ring·ataha, kamachi dong·giparang boloni grao grao dake bilongkatbatoke uni mikkango bildingdinge una jakpa doktokenga gita kusi ong·chaktokengachim. Boldimrang aro pilak nitogipa samsirang, nitobegipa gitchak rimit balengenggipa bibalrang balsri balwa balana gongnok gongnok gongmrikenggon Angelica Hale ru·ringring ring·atenggipa gitni sulrangna rongbrakrang aro rongku·chakrangni nangchake gamatgipa ku·rangna (Echoing) mandera·e tujolenga gita dakengachim. Eva unon Jamesko gipake kusini mikchirang ong·bae aiao inmanpilengachim maina uamangni nikani mandeni janggi tanganio ong·rongbewalo pilak do·drang, sam·bolrangni indake bamgopani namen mandeni u·iani nalsao ong·pilengachim.

Angelica aro Uni Ma·gipa Evani An·sengpilani:

James namen tusipekangaha unon attam ong·pilaha ua jumangna gisik ka·tongo namen katchaengachim indakmitting somoio banoniba uni bimingko minge okamaniko knaaha aro uan uni madrangoni saksa re·bae okamanian ong·achim. Ua mikrakaha aro unon ua attam ong·pilaha ine nikaha. Mikrakahaon Nurserang uko okamengako knae re·angon ua da·ode deme·chik aro jikgipako grongna man·aigenok ine u·iataniko man·e grongeha aro namen kusi ong·ani mikchirang baksa deme·chik aro jikgipako gipake Isolko mitelaha.

Nokdango Ong·taiani:

James adita salni jamano Sikmanchi re·angna skangan nokdango namen kam bangbeaha maina jikgipa noko adita salrang dong·jae nokrang me·chikni taria gitade ong·jaha badia bostuko bachipak dona bilding bildang ong·aha. Aro deme·chikni saanina Children's Miracle Network Hospital, Atlanta-o donanian sal 80 ong·pilaha uarango jakchakjaeba aro gisiko kusinian dong·jae mamingkon daknaba sikjaha. Indake ua pringode namen jakchakpilgija kam ka·aha aro uni kam ka·mittingo uni mikkango kusinian gapengachim. Gisepo uni ku·sikoni gitni sulrangko 'himm...himm...himm...la...la...' gitni kattarang gri sulrangko gamataha. James aro noko dakchakgipa iachi uachi namen kamrangko ka·beaha aro nangarangko breabae nokdrangko nitoataha. Angelica Haleni tusigipa kuturiko ua nambate pulrang, bibalrang aro kalanirang, jedake deme·chikni kalronggipa sopani mapil (Teddy bear)-rangko nokdringo gapataha.

Pringsao ua Sikmanchi re·angaha aro pilakkon dakmano James jikgipa aro deme·chikko nokona rim·baaha. Angelica aro ma·gipa noktangona an·seng baljoke sokbapilahani gimin madrang maharirangba kusi ong·aha aro dintangmancha James namen kusi ong·bataha. Ua jikgipanaba aro deme·chikna namen ka·sabataha, maina badita jikgipa aro de·gipa gri nokdango mai ong·aha ukode James namen ma·siaha. Uni gisiko da·o namen gital ka·dongani aro gisiko kusinian gapaha.

Angelica ka·sine ka·sine bilakrorobaaha aro uko Sikmanchiba gisepo review checkup dakna re·angtaitaina nangkuengani gimin James Angelicako re·angtaitaie check kaatengachim. Angelica maming sadapanirangde dong·dapjaha.

Angelica Hale-ni Americani Aski Ong·baani (Star of America):

Angelica saanirang namroraangaha aro ua namen skangna bate bilakbataha gisepo uko doctor-chi check up ka·taitaina ra·angna nangoba ua namen mangrakbata. Skang gitan ua gitrangko ring·na a·bachengtaiaha uni git ring·na changaniko nike uni pagipa aro ma·gipa una nanganirangko dakchakaha aro uko gitrangko name ring·na changbatatna uko dilaha. Ua chonchongipa programrango ring·na a·bachengaha aro uni ring·anirangna bangbatan namen aiao inmanpiltokaha. Pagipa aro ma·gipa Eva deme·chikgipani git ring·na changaniko nike una vocal coach-na Trecia Greyko Alpharetta Georgia-o skie on·china tik ka·aha. Ua bangbea git ring·suatanirango (competition) bilsa 5 oni bilsa 9 ong·aona kingking bak ra·aha aro bangbataon uan chegipa ong·rongaiaha. Ua uko sangipa bangipa Sikman (Hospital) Children's Miracle Network Hospital and Children Healthcare, Atlanta-ni ong·atgipa programrango uko sananina mitelpilskani gita Charitable Function-rango git ring·e on·aha. Uko mingsing mingamani program ge·saoni program gegipinona sokrikrikangaha.

Ua chang-12 gipa America Got Talent, 2017-o Angelica Hale re·angchengaha. Angelica Hale skanggipa ring·ate nianio (audition) "Rise Up" Andraday-ni gitko ring·ataha unon Judgerang aiao inmanpilaiaha aro uni pagipa James aro ma·gipa Eva mikronrangoni kusi mikchirangsa ong·pilaha. Uamang deme·chikgipako indakgipa gadangona sokbagen ine mamingba chanchisoani aro ka·dongsoanian dong·srangjahachim. Jikse uamang gipakgrike graptokpilaiaha maina uamangni ka·tongo kusinian agansokna man·piljaha salgi bangbango deme·chikgipa sa·gre gita gitchoangdilanga gita daknikpilaiaha. Judgerangba maming kattako aganan jajaangpilaiaha maiko agampilgen changpiljaha.

Judge Cut round-o Angelica Hale "Girl on Fire" ingipako ring·aha jeon mongsonggipa sokgipa ong·e Judge ka·gipa Chris Hardwick uni git ring·aniko namen namnikbeaha aro uni live show-ona basee "Golden Buzzer"-ko sikdepataha. Unon ua Live Show-o ring·anio "Clarity" ingipa gitko ring·aha. Ua Final-ona sokangaha aro "Symphony" Clean Bandit-ni gitko ring·aha. Indiba rasong gribee finalo vote komie gnigipasan ong·rikaiaha.

“Thank you so much to all of you who have supported me on my AGT journey. One thing is clear – this is only beginning! I am literally the happiest girl in the world and nothing can take that away!”² Angelica Hale iako media-o seataha. Ua bi-sa gita namen kuside ong-ja, AGT-ko chejahani gimin indiba ua mikkangchi una ka-dongani tengsubaenga inen ua namen u-ichongmotachim.

AGT-ni Jamano Aski Ong-e A-bachengani:

America Got Talent Show-ni jamano ua Tackahoe, New York-o mande sak 7000 mangni mikkango ga-subee git ring-ahaon manderangni ka-tongko nangatbeaha. America a-songni National Kidney Foundation-ni Angelica Hale skanggipa changna bi-sa chonengon Ambassador ong-aha.

Ua bilsa 2018 March jao Celebrity Fight Night and on Little Big Shots ingipa mesokanio ga-subee ring-aha aro uni jamano March 29th, 2018-o National Hockey League’s Ottawa Senators biko a-bachenggipa kalanio ua okamaniko man-e ga-subee git ring-e manderangni ka-tongko salaha.

Ua da-o Atlanta Georgia-o uni ma-gipa pagipa baksa dong-enga. Uni America Got Talent-o bak ra-mittingon ma-gipa sakgipin deme-chikko man-taie Angelica-na nitobegipa nogipako patiaha, jean una namen katchabeeniko ong-ataha. Uni nogipako Abigail mingskaaha. Angelica da-o mangba uni sagipako ja 3 prako check up ka-taitaikuenga, indiba mamingba serious saanikode man-taikujaenga. Uni saanio namen ka-donggijanirangko cha-grongahaoba uni magipa aro pagipa una an-tangtangko on-kangpile ka-saani gimin Angelica da-alo a-gilsakni Aski rongsa ong-e nakatbaaha. Magipa Eva Bolando una an-tangni kidney rongsako on-jaode ua a-gilsakon dong-jawahachim, indiba magipa una an-tangni be-en bimang aro gisik ka-tong gimikchin ka-saani giminsa ua da-alo a-gilsako tengsugipa Aski rongsa ong-e tengsupana chol man-paaha.

Senokgipani Aganpaani:

Poraisoenggipa pilak jong-ada, no-abi, aro pilak ripengrang ma-giparang aro pagiparang dedrangna iandakgipa ka-saani aro supportko nangenggipa bangbea dedrangrang gnang uamang magipa pagipani indakgipa ka-saani dakchake rama dilaniko nangenga. Chadambe ripengrang daalo an-ching knalko u-ija indiba knal aro jringjrotna Tanggipa an-chingni Gitel Jisu Tangenga ua hajal bilsirangkoba u-isomanaha. An-ching knalko u-ija indiba knalko u-igipa Gitelko u-iahaode Uan an-chingna ka-dongani, maina *‘an-ching mikkangchina kensoe namgni dongja, maina knalko an-ching u-ija, indiba knalko u-igipa Gitelkon man-aha’* (It has no meaning by worrying about future since we don’t know tomorrow, but we have the one who holds the future). Hajal bilsirang una mikjapsa gitasan, ong-aia; Gitel an-ching sakantinan nama daksamsoaniba gnang, “Maina Jihova agna, Anga nasimangna an-tangni chanchianirangko u-ia, chongmotan namgija ong-gija tom-tomani chanchianirangko na-simangna ong-gniko aro ka-donganiko on-a” (Jer.29:11).

Isol Jihova an-ching sakantini bimang ong-na skangan pilakon sesoman-aha, “Nangni mikronrang angni bimang dakkujagipa onganiko nikaha; Aro nangni ki-tapo uarang pilakkon see donachim, chongmotan angnan don-sogimin salrangko, Jensalo uarangoni mingsaba ong-kujachim” (Git.139:16). Ua an-chingna pilakkon daksoaha, unigimin da-o an-ching knalna kensoe namgni dong-ja batesa Jihovana kenanian an-chingna nambatgipa ramade ong-aiaha. Ua an-chingni pilak ka-dongani gri ong-anio ka-dongani Isol ong-a. An-ching badita Isolni sepango janggi tangna man-a uasan an-chingna ka-donganide ong-aia. Ua Isol Jihova, “Indakode pring gita nangni seng-ara nakatgen, aro nangko an-sengatan bakbakan onkatgen; aro nangni kakket ongan nangna skang skang regen; Jihovani rasong nangni jamanchi rakigipa ong-gen. Unon na-a okamgen, aro Jihova aganchakgen; na-a grapgen, aro Anga iakai ine ua (Isol) agangen” (Isaia 58:8-9).

Na-a Isol baksa ia a-gilsako knal mai onngen uko u-ijaoba Jisu baksa Uo ka-donge songreahaode, “Jihova nangko jringnan dilgen, aro ran-gipa biaprango nangni janggiko okkaatgen, aro nangni grengrangko bilakatgen; aro na-a chi rudapgimin bari gita aro uni chi tipgijagipa chimik gita ong-gen” (Isaia 58:11). Daalo darangan jedakgipa janggi tanganioba janggi tangchina, indiba na-a aro anga Kristoona mamingna sintimangija re-bana Uan an-chingni knalko u-igipa ong-a, Jisu an-chingni paprangko niatjaenga aro an-chingko jegalsojaenga, indiba batesa Ua an-chingna ka-sae sengsoenga ‘re-babo angde’ ine okamenga. Badita mande Isolni ku-rangna an-tangni ka-tongko rikatna una aro mikkangchi janggi tanganina namen

² https://en.wikipedia.org/wiki/Angelica_Hale accessed on 12/10/18 at 8:46 Am.

kenbegni ong·gen. Unigimin Isolni ku·rangna an·tangtangni ka·tongko rakatnabe batesa an·tangtang paprangko ku·rachake Jisuona re·babu, aro Jisuko nangni ka·tongo Raja ba sason ka·gipa dakatbo. Na·a jedakgipa papkoba ka·china, na·a jedakgipa sabisiba dong·china, na·a jeoba jedakgipa mandeba ong·china Isol nangna aro angna mairongpile ka·saa. “Aro namgija daka batchina niamba re·bachapaha; indiba je biapo pap bataha, uano ka·saa bate suakaha” (Rom.5:20). Nibo angan Jihova pilak be·enni Isol; Angni amgijagipa maiba gnangma” (Jer.32:27). Isol sakantinan patichina.